

四庫全書

集部

欽定四庫全書

集部  
文憲集卷十五

詳校官中書臣吳璫

中書臣劉源溥覆勘

總校官降調編修臣倉聖脉

校對官編修臣沈清藻

謄錄監生臣沈智

欽定四庫全書

文憲集卷十五

明 宋濂 撰

箴

凡四章

陳思禮以其讀書像求題作讀書箴以告之

古今千載天下萬理曷由知之存乎經史道散文繁歲  
益月增欲窮其金厥惟難能在首先覺示我要旨挈其  
宏綱衆目咸舉苟棄其本而披其枝力瘁心勞彌久卒

迷仁恕于民孝慈于家終身有餘道豈在多惟爾陳生嗜學克孝不形于言已達其要尚虛厥心以誠爾躬聖賢何人敢不慎恭

磨堯堅箴

昔李侍郎敷立嘗揭磨堯堅三字于坐隅磨堯堅者古之慎言人也其善于自防者哉為著箴曰

磨堯堅慎勿言口為禍門昔人之云磨堯堅人各有心山高海深磨堯堅高不知極深不可測磨堯堅言出諸

口禍隨其後磨堯堅鐘鼓之聲因扣而鳴磨堯堅不扣而鳴必駭衆聽磨堯堅唯口之則守之以默守之以默是曰立德磨堯堅磨堯堅慎勿言

全有堂箴

全有堂者何監察御史黃君鄰讀書之室也缺者全之反其謂之全者何無毫毛之不備也無者有之對其謂之有者何心中本具不假外求也其謂全有者何天德也天德之著也如鑑之明也萬理森然隨物而應之也

既曰全有或乃斲之喪之以至弗完者何人偽之滋也  
人偽之滋非學不足克之也克之者何整爾甲礪爾戈  
力戰而勝之也是故生而能全之謂聖人修而復全之  
謂賢人棄而不知求全之謂愚人三者之不同奈何敬  
與怠之謂也黃君欲全其所有非敬將何以全之黃君  
以政學聞于時復遑遑自治不止其殆知求全者歟為  
之箴

繫天局顯性靈萬象森森炯以貞愚不縮智不贏毫末

咸具天人并君子乾乾守以誠其有乃全百體寧

師古齋箴

并序

師古齋者予學子連江陳子晟讀書之所也子晟今人也其曰師古者何志所存也志之所存奈何事不師古則苟焉而已言之必弗詳也行之必弗精也弗精且詳則滅裂之弊生而頽惰之氣勝矣能師古則反是然則所謂古者何古之書也古之道也古之心也道存諸心心之言形諸書日誦之日履之與之俱化無間古今也

若曰專溺辭章之間上法周漢下蹴唐宋美則美矣豈  
師古者乎子歲春秋方盛為古文辭水湧而山出薦紳  
先生交譽之予恐其或偏也為之箴曰

爾欲師古古何所師法言大訓日星昭垂爾繹爾思志  
須刻苦欲提其身必入其戶中唐坦然由戶及庭有宦  
有奧以次而升惟學亦然懼畫於淺日造其深所見乃  
遠人已兩盡方為極功毋局於文一偏之攻此謂師古  
古訓是式我作爾箴服之無數



銘

黃氏義門銘

有序

天地之間有大防焉孝友之謂也水之始也濫觴爾苟  
無土以障之則必至於滔天火之初也螢燭爾苟非水  
以制之則必至於燎原人心感物而動不能無欲其端  
亦甚微不有孝友之人出為表式則淪胥以成風而彝  
倫斁矣昔者先王有見於斯雖委巷刺草之民能行之  
者必旌命之所以贊王治章人風而挽之於正也世之

評唐史者且謂張公藝李知本劉君良孝行推於友睦  
數世不衰真豪傑之士嗚呼當是時金章盪綬之賢皂  
蓋朱轡之英布列中外未嘗無之顧乃以豪傑歸於閭  
巷之士者以其不俟教令所加而後奮也嗚呼南陔白  
華之詩蓋亦商之末世周之盛德也斯民以孝友著稱  
君子可以觀其世矣浦陽黃氏其先與文節公庭堅同  
所自出有諱度者宋隆興癸未進士亦諸祖也元至正  
中傳至諱珪君生三子其二曰隆曰生隆生一子曰逢

原生生二子曰逢吉曰逢昌逢吉兄弟亦各有子至十有餘人三世之間孝友無間言逢吉乃殫志竭慮設為教條饒諸樂石復遣諸子宿請濂銘之嗚呼子壯而分婦姑反脣相稽秦之俗已然矣況去古日遠風氣日益漓黃氏能不染於末習卓然不變其恒度豈非真豪傑者耶浦陽以義居聞者二三人唯鄭綺之家已至十葉黃氏知感慕而興起進修益力烏知不綺若耶雖然許史之稱未足為貴也猗頓之貨未足為富也唯孝友積

諸躬令名昭于時其為貴且富也大矣所謂特立兩間而無媿稽諸賢哲而有徵著之後世而可法何莫不由於斯黃氏孫曾可不思自勗哉能如濂言揆之張公藝之流他日可馴致矣詩有之風雨如晦鷄鳴不已濂於黃氏蓋深有望焉銘曰

浙河東疆地曰浦陽厥氏維黃雙井同枝科名陸離世復詩書有儒其冠以義為藩奕葉共餐視其齋庭左史右經踵武繩繩視其房除前絲後纊燈火與俱至和所

形揖讓而升穆然無聲既衍而葩實而匪夸三代一家  
世道下趨子父割閨婦姑勃鏃十室九哀瀾倒波頽萬  
夫莫回蠅聲方冥忽聞怒霆孰不為驚植範建防翼法  
輔常斯惠之亢造端非難延裕維艱任重如山如為高  
陵世益代增非人獨能如松之青故隕新承所以永貞  
古先與謀庶行之修其道曷由執敬為符夙夜究圖百  
世如初

浦陽深溪王氏義門碑銘

有序

浦陽於婺為山邑唐天寶末始割義烏蘭溪富陽三縣地置之人生其中往往樸茂淳質力農務本恥於華言偽行而以士自命陳文毅公盛稱書傳所載古者禮義之俗殆不是過其言信不誣矣載稽其事梁貞明初縣人何千齡四代同居宋淳熙中鍾宅亦至三世何鍾二氏之間而冲素處士鄭綺奮然興起教子孫無別火而食志確見凝尤非二氏所能及故六傳至文嗣而家益昌元至大末旌其門閭而於力役之征俾無有所與宋

元二朝國史皆為之立傳蓋自建炎初迄今已歷十世  
踰二百五十春秋矣深溪王氏其先出於烏傷之鳳林  
有諱萬者字處一擢宋嘉定癸未進士第立朝謇諤凜  
然不可犯憚壬畏之為之斂迹終官太常少卿諡曰忠  
惠少卿之弟菱三傳至某生二子澄汶澄以忠厚為家  
州里之無告者煦之以仁人愛戴之不啻其父兄瀕終  
集家衆言曰汝曹能合族如同里鄭氏吾瞑目無憾矣  
言訖而逝澄生三子子覺子麟子偉子麟出為汶後皆

善紹先志子覺生五子應念舉慶聰子麟生一子憲子  
偉生二子懃恩而應之伯仲又各生子踰二十人矣子  
覺與子麟合謀召子姓謂曰一體之分散為九族痒疴  
疾痛舉切吾身收族而聚居是謂博本離宗而自矜是  
謂乖義古之道也今吾家相傳四葉矣和孺之樂雖殷  
管攝之計未建庸非闕歟况吾父有遺言欲法鄭氏鄭  
氏於吾有連其成規具在吾將損益而行之何如於是  
應念帥諸弟踊躍承命請叅定家則一卷朝夕遵之唯



恐有所失馭家之禮質文之兼至應物之務內外之齊  
飭薰蒸太和之中壹圉範圍之內鄉人士莫不感厲而  
歆艷之子覺且謂不可無以示來者既勒家則于碑而  
復徵瀛文以紀其事昔者成周之世九夫為井井方一  
里而一夫受田百畝其家衆男為餘夫亦受二十五畝  
賦由斯而出夫由斯而定其勢不得不分當是時未聞  
有同居累世者也其相親相恤之政則有大小宗法存  
焉大宗譬則幹也小宗譬則枝也枝雖有千萬之不齊

而其幹終一而已前王持世之微權蓋不得不爾也自夫封建宗法之制壞九族之親漫焉不相統屬儼若秦肥之視越瘠仁人義士乃於服盡情遷之時綴之以食而弗殊事雖有異於古不猶行古之道乎哉浦江叢爾之邑以義居聞者三人而子覺又不悖先訓蹶然而思繼焉古者禮義之俗誠豈有越於此哉文毅公之言至是益可徵矣子覺本名閻之後金華諸族亦同出於鳳林其顯融者項背相望而淳熙宰相為尤著宰相勢隆

望重尚未能合族以居而子覺一韋布之士乃斷然行之斯可謂之賢也矣雖然靡不有初鮮克有終子覺之嗣人尚世守遺法而不墜他時將與鄭氏儷美而交輝聖朝以孝治天下旌異之典未必為子覺惜也龍光下燭行當煥煥於山川之間矣漁因不辭而記之又繫之以銘曰

易著同人合乾與離上參于天火之赫熹類族辨物君子以之況我宗屬一氣之為譬猶單幹漸敷羣枝服雖

少殺情或甚非物我相形矛盾迭馳借糧取箕諄語絲  
披所幸天衷亘古無虧不有人豪務克已私何能大公  
拔其藩籬浦陽之江其沅瀾瀾太樸未散民醇俗熙以  
義聞者接軫聯惟有美王氏裔出紳綏佩厥先訓如銘  
鼎彝大合其族嗜義若飴夙夜無訾竭其心思度物引  
類取式樹規鉅探浩渺細入密微日約月會有文可稽  
耄倪同心一唱百隨孰為範防徵禮與詩以匡念慮以  
肅威儀如水斯瀦畚築以時涓滴弗戒不翅漏卮古云

孝弟致家之肥匪間古今驗若著龜維彼崇構肇自築  
基既堅既飭棟宇翬飛維彼跬步千里在茲行行不息  
其至無疑上慎旃哉勇毅自持誰謂華高企其齊而太  
史造銘勒之豐碑

節婦唐氏旌門銘

有序

皇帝恭膺天命誕敷文教凡有繫於民彝者輒加旌寵  
即書所謂表厥宅里樹之風聲者也粵洪武七年春三  
月姑蘓守臣某上言吳縣編氓張成妻唐妙堅生二子

而成卒堅年二十有七廼忍貧鞠育指天自誓曰飛鴻  
尚不再偶况於人邪遂不施膏沐日處寒燈敗帷中或  
憐之欲奪其志每涕泣以辭今五十又七二子頗有所  
成立州里稱之無異辭者里耆某言其狀于縣縣上于  
府監察御史加覆覈焉咸謂得表署其門如制令臣敢  
昧死上中書以聞制曰可於是符下有司行事并復其  
力役之征俾無有所與其子彥存竊以為龍光自天照  
耀下土不可無以宣布上德以昭示悠久請大都督府

照磨馬嗣能徵濂著銘鏡諸樂石濂惟夫為婦天大倫之攸繫故士昏禮有云下達納采用鴈釋者曰取其不再偶也盖有夫婦而後有父子有父子而後有君臣夫婦之道貞而天下可得而治矣聖皇在御持化機而制六合褒嘉貞節所以化行四方而作新斯民者也濂待罪國史法當備載其事且繫之以銘曰

聖人御極惇叙天彝弘敷大訓陰執其機樹之風聲何物不動管攝人心邇赴遐聳有婦氏唐采歸于張克產

二雛其夫遽亡泣淚既盡繼之以血相隨九泉乃我之  
節嗷嗷者雛匪親孰依忍死鞠之心唯天知寒飈蕭蕭  
燈青在壁月落參橫猶聞夜織或憐其孤諷之改圖豈  
無甘薺何忍茹荼含淚陳辭鴻不重匹人為物靈敢弗  
之敵厥子既長頭角嶄然苦節之亨由持之堅牧守上  
言請加褒錫帝曰俞哉朕豈汝惜烏頭雙表有歸者門  
銀榜漆書其光煇煇皇匪爾私用為世勸推而達之民  
罔不變子則盡孝臣宜竭忠三綱既建比屋可封國史



造銘勒諸樂石奉揚鴻休以詔罔極

忠孝堂銘

忠孝堂者飛熊衛指揮使司僉事徐將軍之所建也將  
軍名桂字庭芳宿遷人也自幼負英氣稍長荷戈從軍  
開平忠武王北伐中原馮宋公南征西蜀太傅徐魏公  
遠討朔漠將軍皆在行間當戰陣之間勇氣百倍褰旗  
斬將奮不顧身近臣以其事聞皇上壯之自散騎舍人  
即陞為今官命既下將軍舉手加額慨然太息曰桂也

遭逢盛際忝被官使方愧不能效犬馬之力一旦上承寵渥自八品超居第四雖天之覆燾地之持載莫可比喻私竊以為報君唯在乎忠凡於國事近則服勞禁禦遠則捍禦邊陲無一絲不盡于忠庶幾少竭人臣之義然而五藏百骸從親所分鞠育訓迪之艱勤日擢髮而數之亦不足計其生全之德事君固當忠養親其又可忘於孝乎桂得以忠孝二言揭為堂額出入日見之日見之則心不忘之矣將軍言既畢復請濂為之銘濂聞

忠孝者天地之間大經大法也為子克盡其孝為臣克盡其忠始合乎物則民彝之正無是者非人也古之聖賢多矣著之為經箋之為傳雖曰千萬言之多無非舉此以防民也將軍今知務此則先立其大者矣然言之非難行之實艱將軍尚思勉之能勉之異日為將為相亦宜也非僥倖也銘曰

上下兩間參之者人若非孝忠能與之鈞其忠斯何務宣其力報國一誠皦如出日其孝伊何如事神明視聽

之際先於形聲有能孜孜日新不匱覆載之中俯仰無愧一失其道是謂薄夫犬彘雖賤不食其餘洸洸徐君其力如虎談笑折衝疇敢予侮北伐南征靡役不從銳欲建功名徹九重遂從散騎超掌禁旅出入佩劍以資還衛帝德如天罔敢弗欽何以報之終始一心高堂有親况臨白髮愛日之誠於焉實切崇構舒舒圖史紛如粉版玄書蟠蛟結螭是顧是瞻赫若明命毫絲弗愆壹純乎正孰謂二者不得而兼所施雖殊實本一源願守

此心堅如鐵石太史作銘勒諸坐側

鮑氏慈孝堂銘

有序

歙之鮑氏故衣冠家也其諱宗岩者身載明德弗售于  
時人號為棠樾處士當至元丙子郡將李世達軍叛羣  
寇相挺而起肆其屠戮歙民相驚皆風雨散去處士君  
與其子寶慶教授壽孫共伏大壑中未幾寇嘯呼而至  
執處士君反接于樹抽刀將割之教授出泣曰吾父耄  
矣不足以汚兵鋒願憐而勿殺即殺我請代之言畢引

頸就歿處士君曰吾祇生此一兒死我猶可吾兒死則宗祀絕矣慎勿聽之相為讓者良久寇欲捨之或掌制於衆欲兵之又弗忍計未知所定忽有風颭颭起林木間類鐵騎蹴踏聲寇相顧怖愕疑官兵將捕已亟相率東趨父子因得釋歛人士咸歎曰孰謂無天道哉使無天道處士君父子何為乎而弗死也其慈孝之報乎當處士君之受縛子但見其親而不識有身父但見其子而不知有已死生禍福尚不暇慮初不知何名為孝何

名為慈乎脫使處士君曰我必如是乃為慈其子又曰  
我必如是方為孝不幾參於人而不純其天乎嗚呼有  
若處士君父子足可為世勸矣然子為父死古之人多  
行之者固可為勸也若父欲存其子而自殞其生其可  
為勸乎曰非是之謂也處士君為存宗祀也為存宗祀  
孝之大者也不然則其宗為若敖氏之餒鬼矣用以為  
勸何不可之有哉予與鄭內翰子美游子美歛人也其  
談處士事甚悉予每為之太息慨然遐思其為人今處

士君曾孫任請予請曰任之祖父嘗以慈孝名堂鄉先達程公已為造記先生能復銘之乎予因歷序其事而繫之以辭使任勒諸堂上子孫世守之以為式鮑氏之世其益昌矣乎任端恪有學行蓋懿然君子人也銘曰父子之道一體而分天性昭然萬古無昏氣血感通罔間毫髮伊誰枯之戶庭胡越惟歛鮑氏世敦詩書子勉於孝父勉於慈宋鼎將移羣寇方熾不幸遭之反接于樹有子含淚長跼致辭刀劍在前目不見之無死我親



我死則可親死子存千齡亦天父謂其子我耄及之日  
月所照寧復幾時冀子之生得存宗祀生生無窮孰謂  
吾死白刃可蹈難違者天若父若子何人弗賢冠雖匪  
人天嘏是錫疾颺西來褫盜之魄玄聖樹教重惟五倫  
五倫有愆曷名為人慶延于家繩繩孫子孝慈之報庶  
其在此有歸者堂揭以嘉名仰而瞻之如交神明為上  
或碩為下或悖來游來觀翻然自悔

黃氏悅親堂銘

親可悅乎曰可悅之以道悅也非其道不悅也悅之之道奈何溫與清無爽也定與省勿讐也可也而未至也視於無形也聽於無聲也日用三牲之養也可也而未至也寶厥身也若愛瓊珍也慎所履也如在淵冰也跬步不忘乎孝也可也而未至也然則何為之至也身之顯也親名之彰也親名之彰也族婣之所艷也僚友之所願也州里之所榮也悅也然則斯悅也外也非內也是何言也是何言也外自內出也有諸內必形諸外也

不可二之也建安黃居德養親之堂題之曰悅親居德  
以文辭致身為鄴都尉其身將顯也予故援此以告之  
也孟氏所謂悅親也人習而察也予不敢勦說也銘曰  
悅乎親在顯乎身所以揚乎人人曰誰氏之子親譽因  
茲而有聞身者親之枝斯須不敢毀傷始為行之醇天  
經地義吾敢弗之悖嗚呼揚乎人顯乎身所以悅乎親

正心堂銘

有序

元臨川監郡芒侯嘗名其燕息之堂曰正心侯既以此

自治其身而化其民又推以教其子入國朝長子文績  
司教成均思嗣侯德不墜復以堂銘為請三代盛時凡  
有國有家者皆不敢不學其學未嘗不本於心譬之操  
權衡以制輕重持規矩以裁方圓凡有形者皆不能違  
是以事功成而習俗美先王之道既息居乎位者不知  
學學者不知所本竊竊焉欲以私智小數勝之而民卒  
不可得而治前代之事如此者多矣而元為甚芒侯生  
乎其時獨能取聖賢為學之道治其身其天性之過人

遠矣文績又能推之以淑諸人非善繼志者哉銘曰

昭哉聖則厥要甚寡正其一心以對天下一心之量天  
容地深炯若日月孰不照臨其不正時日月方晦昏亂  
迷惑靡有攸屆誠其始萌乃正之功知不周物思誠曷  
從維知克誠維誠克正正以持身罔敢違令內以為家  
外以臨民明盡禮樂幽通鬼神世降道離人鮮由學徇  
其私心狙伺狙攬偉茲芒侯監于大邦揭聖明訓實諸  
崇堂崇堂嚴嚴筵几具有邦人君子陳說古道孰詭孰

端昌從曷違折以片言灼如著龜豈徒其名又能允蹈  
既政以施亦身以教侃侃嗣子先人是程緝其休聲亶  
為難能勿謂已遠千載一心聖謨炳然奚古奚今

正誼堂銘

三代而下惟漢董仲舒最為醇儒其輔江都易王也告  
之以正誼明道之語千載之遠人猶誦而法之比無它  
慕之也長樂有士名時貢其姓亦董氏以文行入選亦  
充楚王府伴讀朝夕執遺經侍王開陳內聖外王之道

遂慕仲舒之言取正誼名堂徵予銘銘曰

惟仲舒氏其德之醇其四方之所則儼其有間於越秦  
矧同出於已姓厥初亦一氣之分雖派別而枝殊比之  
異族而尤當親其所親親之伊何正誼是遵赫明命之  
在目思制事之有倫豈絲髮之敢私察天人之相因廓  
然大公一歸至仁此所以務為匡正鄙其詐力不足稱  
於大君子之門更生之許王佐斷不為失而孟堅之著  
論乃徒致於糾紛有美董生文行孔馴當侍經於帷幄

日闢切於典墳苟拾綴而漸升又安知不為王傳之  
尊名若同而實同將何愧乎古人彼峻者堂聳以華棻  
我銘其楹用代書紳

貞白堂銘

古君子於治身之道詳矣而居室未嘗有名近世之士  
畧於自治至於居室之名則務極其美昭而日月風雲  
雨雪霜露大而江河山嶽林泉丘壑細而竹樹草卉鳥  
獸魚蟲凡可以託情而比德者皆取以為名名則美矣



於身何補哉誠能揭仁義道德之要著之於目而存之  
於心禁邪而止慝服之以終身而不蹈流俗之弊此不  
猶得古君子之意乎臨川許仲孚篤志嗜古以貞白名  
其堂蓋將矯夫側媚汙濁之弊以治其身是可謂善為  
學矣其友芒父績來徵銘銘曰

天不貞天柱傾地不貞地軸勝日月不貞乃蝕其明陰  
陽不貞寒暑僭行况伊人斯敢不貞有不貞者殞厥生  
天以白物罔惑地以白庶物育日月以白四海昭燭陰

陽以白民用弗忒人苟弗白為暗為僻彼何人斯敢弗  
白有弗白者戕身喪德維許子學孔腴以貞白名堂隅  
豈銘爾堂將銘爾軀匪徒飾外宜銘諸心矢弗渝爾心  
之貞為道之樞爾心之白為德之居勿側以敬勿涅以  
汙持之永久為聖之徒

雙椿堂銘

三槐名堂預知顯融之兆五柳有傳式啓肥遯之趣蓋  
緣辭以達志而其文特繁託物以明類而其義最切粵

自前古以逮方今指意固殊塗轍則一有若右司都事  
某君器局凝遠識度迥卓篤愛日之誠隆悅親之道奉  
其仲父並於嚴君建一室之靚深揭雙椿以為號氣同  
於祖奚須類我之祝孝推乎親必盡構堂之志椿之五  
倫十起之私阿新思繼之晚昭然軌跡莫擬光塵由是  
美聞流於縉紳永歌傳於絃簡不鄙狂瞽漫紹徽音其  
辭曰有雙者椿離植于庭脩莖並擢峻葉均青涼露夕  
晞灝露晨零材非齊散壽比莊齡美茲華構託以嘉名

雲聯遙戶月澹鮮櫺中有二皓古之壽朋鶴髮齊素台  
背交升商宣宮奏柏茂松貞厥子能令省署蜚聲絳衣  
執板賢冠垂纓調陳五鼎養或三牲簪裳生豔州里流  
榮雅辭振玉麗句雕瓊文屏作軸翠琰鐫銘禮敦民典  
孝篤天經名教所繫善俗攸興凡百君子宜鑑宜徵

連槐堂銘

有序

人事無與於草木乎孝友之徵古多記之矣草木果符  
於人事乎則大舜閔魯之行未聞形於草木之祥也然

則將何所定歟人之於天體異而氣同養吾氣以感之  
寒暑可自我而平日月可自我而明山川可自我而不  
震驚鳥獸可育四靈可至况草木乎然而有得有不得  
者變也物隨以應者常也變者天之權常者天之經天  
以經示人而以權教人以聖賢之惠盡為入之道固其  
職也雖勿報焉可也未至於聖賢而能不悖於道焉可  
以弗旌乎是權也或因物以著戒或設象以假義又權  
之教人者也苟遂遂焉而報之仍仍焉而見之智者可

以理推愚者可以幸得則不足以為天矣天道之權吾  
於會稽周氏有徵焉周氏兄弟曰彝兌皆賢而文居新  
昌彩烟山中事母甚孝入其門少長秩秩有序其氣穆  
然若陽春然鄉人稱之為孝弟舍傍樹槐一章高尺餘  
岐為二幹及肩交合為一左右之枝各三上挺然數尺  
再合而再交焉於是觀者咸歎其異以為彝兌孝友之  
徵乃以連槐字其堂其友王宗成來京師為之請銘槐  
之為音近於懷懷者思也所以旌其孝友而教其後人

以思也後人視斯槐寧不有思乎其枝歲繁而時茂猶  
子孫之愈久而多也子孫雖多其本於祖則一而已猶  
槐之衆枝本於幹也嗚呼周氏後人視於斯槐孝友之  
思其能忘乎此天之所以教也烏可以無銘銘曰

周氏孝友惠斯植天旌厥槐世希覲巨本數圍去地尺  
岐為雙幹挺雄特及肩而交交復副既副羣枝合如織  
鄉氓里耄歎以噴炯哉奇祥古未識吾知玄化彰爾惠  
俾爾後嗣思作則枝繁幹別勢莫抑同氣殊分麗千億

槐枝可連人可析

持敬齋銘

吏部員外郎翟君大年謂余曰大年頃註于吏議繼蒙  
有宥預有祿食列于英俊之後追思舊愆未嘗不惕然  
惴慄因以持敬名所居齋庶或善其後也請為銘以自  
勵焉銘曰

坦途不戒驩或蹶羊腸畏惴駕可越靈臺孔微役萬物  
物來不制昏以逸持之以敬志斯一古之明訓作自哲



曰人敬勝怠則吉心不持敬中蕩瀟四體不敬形縮瑟  
不敬而言支以怵行而不敬遭僨跌矧茲有職紛轆轤  
上有嚴臨下羣列苟或不敬衆爾唾鬼神遼哉徇恍惚  
語之無聞罔由詰敬以格之迅如駟况均為人視聽徹  
事之以敬寧弗悅告爾持敬久愈晰德樹名彰底崇秩

### 時習齋銘

時習齋者江南行臺侍御史秦公之所自名也公河南  
人名從龍字元之歷事五朝為時名臣年踰八十而猶

挾冊齋中玩而繹之濂間往見公聞其言皆經緯道德  
壹歸之經傳則其澤被民物勲列太常者何莫不由於  
斯時習之功不既盛矣乎宜其年既耄而猶孜孜弗之  
懈公戒濂銘銘曰

水之習坎積則盈君子法之德乃恒

玄默齋銘

全椒孫仲善氏名其齋曰玄默危學士蘇脩皆嘗遺之  
以文仲善復求余繼作脩史事嚴厯數月未能撰述仲

善又更求之今因休沐之暇輒援筆為之銘夫玄默者  
葆和之要道仲善能從事於斯則近道矣銘曰

玄兮默凝神於恍惚默兮玄欲潛思於九淵曷若渺渺  
綿綿歸之自然一氣孔神超乎象先誰為之後孰為之  
前至矣哉此所謂鴻濛之根毓丹之田也久而行之與  
道周旋可以接韓終之袂可以拍洪崖之肩勉旃勉旃  
必守夫規中焉

介石齋銘

金陵管君名豫以時順為之字以介石題其所居之齋  
皆取乎大易之義也蓋管君嗜學弗懈既習儒家言又  
通天官之學當皇上龍飛定鼎江左材藝之士無不寵  
任之管君用薦者擢為歷官已而建太史監遂改春官  
之職管君益竭其知慮凡氣朔之盈虛氣度之遲疾或  
步或推罔有絲毫愆忒上嘉其勤會廷議易太史監為  
欽天監遂命管君為之令管君亦可謂至榮也已然其  
進學之心猶孳孳也且謂豫以悅樂為義易致沉溺必

以中正自期介如石焉則能審其幾微上下之交不至  
於謫瀆矣乃掇介石二言以自警嗚呼若管君者其知  
豫之時順之道乎雖然豫之彖辭有曰天地以順動故  
日月不過而四時不忒管君苟以順而測天其又有契  
於不過不忒之理乎大易之道無所不包故予發其意  
於傳注之外而復繫之以銘銘曰

豫之為義動以順苟耽于逸爽其正節介如石剛且勁  
其幾始兆見輒定自微而彰若龜鏡下不加褻上弗侮

如此進學德將凝或冥或鳴戕厥性戒之初終制乃勝  
有齋肅如更嚴靚我銘其楹宜敬聽

古愚齋銘

延陵韋侯彥芳吳中書僕射侍中弘嗣之四十七世孫  
夙以文學著聞亦既受薦於臨江別乘會二千石闕侯  
實行守事情孚化洽民宜之然猶不忘進脩以古愚名  
其齋居侯殆有志古者乎志於古美矣古學之可法者  
頗衆奈何獨有取於愚乎有取於愚斯其所以為不愚

也歟是宜銘銘曰

唯古之愚如穀斯弩直矢一發奮往弗顧惟今之愚如  
履多岐詭秘變化曾不測其所之古故為疾今復非古  
致宣尼之所傷奈人偽兮旁午我情鬱紆曷日而攄豈  
惟賢不逮昔愚亦不如邈埃風而屹立懷嫩人於千載  
不有君子善則誰采彼焉多詐睢睢盱盱心自以為智  
人觀則愚我愚我守直情徑行孰不愚我我智斯亨以  
愚而名豈無柳氏為激而過中同於自謚我將何從聖

謨孔邇終日不違希顏則是

居易齋銘

衢之常山有簪纓世族曰魯氏蓋出於宋參知政事肅  
簡公貫之之後自毫而來遷舊藏玉刻傳宗印可驗其  
遠孫濬文念祖德深長思繼承之甚力種學績文惟恐  
有弗逮州縣察舉其才貢之中書中書奏濬文才行雅  
飭擢為侍儀舍人遷秦王府典儀將行詣詞林請曰濬  
文讀書之齋名曰居易鄱陽周先生伯溫為書三大篆



揭之願以銘文為屬予謂居易乃素位而行外物之來  
一歸之於天君子進德之方有出於此者乎是宜銘銘  
曰

君子守分如守百職出位以思乃德之賊銀黃三組庾  
粟萬鍾我合受之不以為豐衡門棲遲藜糲是食我則  
安之不見其嗇此非在我皆天所為天則孔邇我敢悖  
之或逆或順視之若一心以道寧不累於物徇而弗察  
非怨則驕惟外之願而中則搖觸類而推何往非正其

正伊何安於義命侃侃魯生文獻之家夙夜以思揭德振華齋居深沉蛟螭作篆前陳回谿右撐翠巘爾居爾易勿險與難上慎旃哉德將不刊

茂承齋銘

閩人鄭子尚世惇詩書為良士其父周可君尤能以道自娛所居曰至德里並舍北南環植以蒼松鼓髯奮爪儼若蒼龍然嘗喟然歎曰始者拱把爾今則大將十圍人之種德其亦有類於是乎御史鄭公過而嘉焉名之

曰松庄云周可君既乘風御氣游神於冲漠之墟而松  
固無恙寒光涼翠益翹然發舒子尚日徘徊其下仰而  
慕俯而凝悵然其若思已而曰先子不可見矣倘能承  
繼之庶幾其不死矣乎乃取詩所謂如松柏之茂無不  
爾或承之語扁其齋曰茂承蓋萬物榮於春悴於秋各  
繫其逢惟松也舊葉將落而新葉已生所以四時而恒  
青子尚欲承父志無須臾間斷其將常茂而益榮者哉  
子尚亦善於取譬者已子尚以明經試天官歸教長樂

鄉校其將行也介國子錄趙伯庸來徵予銘銘曰

有松九九兮于彼郊坰來者既續兮往者始零衆悴黃  
賁兮其色獨青嘉名斯建兮象類之精父經能傳兮於  
粲其榮繼繼承承兮允有餘馨毋玩葩澤兮忽彼堅貞  
太史造銘兮勒於軒楹

宇定齋銘

靖江府伴讀方生仲文崇安人以宇定名齋蓋取莊周  
宇泰定者發乎天光之言釋者謂氣宇開泰則靜定也

既靜定矣天光自發人見其人物見其物初無彼此膠葛之異懿哉斯言乎其衛生之說乎或者不察類以周多寓言輒泛引而非之周言固傷乎過高若此者其有不可取乎苟不取不以人廢言之說果何指乎為著銘曰

君子養生能兒子乎專氣致柔而肯傷於躁急乎雖終日嚙而噬不噉乎此謂太和塊土而不由喜怒乎外物其能撓乎四體其有不順乎所以神之凝然氣之融然

泰而安乎天光照耀物各付物而不淆亂乎夫若是天  
其天而不參於人乎芒乎忽乎熙熙乎其有出入乎無  
出入乎壽可至於廣成子乎予有疑乎無疑乎人讀予  
文有能察予之中情否乎

種學齋銘

有序

姑蘓張君其名為田其字為芸已遂以種學號其齋居  
濂聞之而歎曰何芸已之善取義者歟蓋其先人子昭  
君積書滿家而日讀之芸已又從而繼之非惟芸已也

其子肯又能善承而勿使替之是張氏種學者三世矣  
因為著銘勒諸齋中一以昭種之之功一以為芸已父  
子勗也銘曰

我有心田為寸者方何以種之以道德為之秧其葉油  
油其本泚泚仁耕之而義耨之唯恐涉於歲荒俟彼西  
成於繁其箱可以續烝民之命脈可以佐至治之馨香  
此韓子之喻崔生所以欲久積而大昌肯舍已以從人  
不以禮而為防有美君子厥姓惟張通經而探乎玄髓

挾文而煜乎星芒取種學而名齋欲孳孳而自彊史官  
作銘揭之中堂願是薦而是褻終大迄於豐穰

默齋銘

陵川和君原德以文行稱趙晉間嘗被薦入朝稱疾辭  
去結廬太行之顛題曰默齋其友湯子上為之請銘銘  
曰

昊穹上運玄壚下處風雨霜露得其平日月星辰得其  
軌江河山嶽以流以峙百物以生萬彙咸叙不發一言



而莫敢失其恒職者以其本乎至誠之理也維人之生  
內則五性七情外則三綱六紀所以發於中而應乎事  
者欲其酬酢適宜辨析非是固不能歸之於一默而已  
然苟無誠慤存乎心徒欲以三寸之舌取勝角靡上陳  
為諛下喻為詭陰謀規利邪說誇已其去道不亦愈遠  
矣乎昔者孔子嘗欲無言顏氏如愚亟譽其美彼由與  
賜佞口多言棄弗之取其所尚可知也絳灌不文外若  
拙鄙而功茂績偉晁氏之子號稱智囊卒啟戎兵身斃

于市惟躬行之為貴何言語之足恃晉有和君力學未  
仕期實踐以自脩獨默默而無語此蓋將矯便佞之陋  
習而庶幾乎顏氏者非耶

恒齋銘

考功丞李君名永永為恒久之義遂以守恒為之字復  
自號其藏修之所曰恒齋易有之恒久也蓋恒之為卦  
震上而巽下雷震風發二者勢必相須所以恒久而不  
已也李君有學有守之人也既取是義為字與名又揭

以命齋其篤於信道常而能久者歟為著銘曰天地之  
道恒而不窮剛柔相應雷動風從君子觀象隨時變易  
終始循環惟道之適苟執一塗子莫之中無權以行是  
謂真凶日月在天旋運不息躔次所經固有差忒陽陰  
代謝寒暑迭更盪摩呼吸萬物乃成唯久故恒動有常  
則惟恒故久靜不留物聖有明訓樹此教基逐物而遷  
有愧巫醫侃侃李君所學淵奧立不易方大中是蹈彼  
不度勢獨浚之求或處非據無禽致羞孰正孰偏有若

白黑慎而行之永保終吉

冲虛室銘

冲虛二言迺玄門之關鍵道學之符徵也嗣天師張公  
取以自號復名其齋居金華宋濂為掇其義而為之銘  
銘曰

惟其冲足以全玄黃之功惟其虛可以幹造化之樞盖  
和氣益於四體而空以涵夫中腴壹脗契乎自然曾弗  
爽於無為迎於先而不見其合推於後而不見其離雖

恍惚其有物竟孰探其幾微彼專氣如伏此抱一若嬰  
兒以大道之難言姑假象而示斯神明之胄為世玄師  
約萬言之喉衿貫一理之妙機瓊臺小史執筆受書掇  
三洞之隱文請揭之於座隅

陳彥正丹室銘

陳君彥正家在浦陽大山間實與龍湫五洩為隣岩巒  
迴互林木蒼翳絕不類人世彥正日走其下當夜靜月  
白時輒登高危坐冥然長思欲求古仙人與游而不可

得每天風翛翛作聲輒以為王子喬韓眾輩真躡鳳吹  
簫而來也如是者數年一旦有貝君一默者過之謂曰  
子若是甚無益也子欲求之盡學長生乎一氣孔靈凝  
之者神之攸庭黃房窈冥綿綿若存是為天根子能  
有意於斯古仙人不難致也彥正樂其說之美乃稽首  
再拜膝行而前曰某不敏竊妄意浮游塵埃之外不自  
期凡質之未易化也先生不以為非而辱教之願終身  
服役為弟子敢問其所欲者何先貝君復曰吾道貴清

靜吾養神丹鷄犬不可近子盍別為丹室以處我彥正  
欣然從之乃即所居之東若干步作室一間中設一榻  
貝君與彥正對坐其中而鑰其所從之門外不可入內  
不可出前留一竅以納漿食後通一竇以傳便液蓋將  
專一心志以絕外慕云室既成彥正錄貝君之言以告  
濂曰子宜為我廣而銘之濂聞古仙人之往來多在霍  
廬五嶽金庭洞陽赤水仙都諸山攷之九微志可見已  
五洩處越水之濱固不足以附麗諸名山而齊之謝玄

卿曾採藥其中後竟仙去漁嘗至其處乘風放歌使覺精神遐漂駕瀨氣於溟滓莽蒼之間惜不得玄卿輩與之共語悵然而還今聞彥正結室其傍又得見君為之依歸焉得無歆豔乎因不辭彥正之請而備書貝君之言廣其意而為之銘銘曰

天地構精日月攄持雌陰黃包雄陽玄施內有太虛明靈所都是謂規中執神之機超乎羣品不分精粗古之真人日與之俱三筆生津五氣布基水虎斂魄火龍藏



珠金華先倡白液後追闔泥九天行空飛入火蹈水  
不燭不濡或嬰霓幢或翳鳳輿杳然玄化莫知所如五  
洩之山蛟龍所居下有隱者山澤之臞乃連曲房乃列  
鼎爐浮游黃宮神光舒舒蠻君背劍鬼伯執爿以呵弗  
祥以衛不虞養爾神嬰出有入無定見金童手持簡書  
致上帝命召還玉樞尚慎旃哉勿亟勿徐我作斯銘勒  
之座隅

蒼雲軒銘

有序

世皆稱嚴子陵不屈光武以為高士之間學固求所以行之耳苟得賢君事之而行所志君子之所樂也況光武素知子陵哉子陵之不以隱為高也審矣其隱盖有所為爾人之志意材量明者能燭之於事為之先子陵光武少相友善使光武能任人可為盡力子陵何所苦而不出既出而決去哉盖光武察察自用其後宰輔多不以禮退子陵預知其如此故決然避去而不疑以全故舊之義此子陵所以為高也苟徒以隱為高孰不

可為子陵哉子陵裔孫居餘姚者曰宗道取范文正公  
祠堂記蒼雲語名軒余恐其昧乎出處之義也告之故  
系以銘銘曰

維士為學志大行于時孰肯樂隱屈而弗為卓哉子陵  
識時之幾幾不可以出甘耕釣以嬉此為百世之師苟  
時可行而飾隱以欺是棄其天而失時宜嗟吾子陵志  
豈在斯爾宜則之勿執固以違視時推移如雲在山何  
滯斂與施或不盈握或雨四垂庶乎于道之歸

韋軒銘

閩有大儒曰朱公喬年自以性偏於剛效西門氏佩韋  
以為警因號其齋曰韋靖江府伴讀陳伯武亦閩人也  
有景行先哲之志用韋名軒所以提其身者勤矣灑懼  
其矯枉而過正也為之銘銘曰

韋之為義乃獸之皮可以束物枉戾而相違故其文上  
下為舛而中則從圍自非柔而熟之安能變生革而如  
脂古先君子佩之自隨蓋戒夫剛悻以自好狠愎而為

非矯其過固不宜不力若馴致於純柔純弱又必招削  
薄之譏嗚呼噫嘻大中之為物也微若神著坦若九達  
何不洩洩于于濶步而長趨近則入善人之室遠則為  
聖賢之歸不亦暢志乎而陳氏之子問學得師本漸者  
必上升膏蓄者必有輝指柔人以作極纂前脩之風徽  
予造銘而昭之竟不敢褒而以規

菊軒銘

金華韓先生進之以耆年碩德為州里後進所矜式文

章問學既不獲用於世乃寄情於鞠華東籬之下環植  
之亡慮數十本蓋以鞠有正色與先生所稟正性相符  
故當風露高潔之時獨致其妍而非凡花豔卉之可同  
也濂四十餘年之老友也雖不能文為著鞠軒銘一首  
先生當與我刪之銘曰

鞠有正色具中之德君子法之以無頗與僻鞠有落英  
斯鞠其馨君子餐之期不爽厥真菊兮君子兮合為一  
兮終無忒兮永為民則兮

蓬軒銘有序

新安胡君寧之作室城東隅旁隘中竄翼以欄楯而其  
制類舟招弟子肄業其間楊內翰剛中曰是期以濟川  
者也宜名汝舟寧之子英復構軒於前以蓬為字蓬  
者舟之蔽也雍虞文靖公白野忠介公宣城汪文節公  
咸為賦詩壬辰兵變化為菑翳之墟英亦避地城北岐  
陽山及四海底寧英擇地山陽洊造書室而軒亦繼完  
書云若考作室既底法厥子乃弗肯堂矧肯構古亦有

是言矣今若英者能承先志而弗墜可不謂賢乎哉為  
作蓬軒銘銘曰

歟多大山下瞰平陸嶺接峯聯前奔後逐如瀛海內波  
濤起伏有美君子構室山麓因水取象揭以汝舟功期  
濟川最之進脩維舟之用視蓬為急籍以葦蒲紉以紵  
綦障除雨風奠安衽席豈無桂櫂艤河之洲亦有蘭橈  
載泛載浮匪蓬斯完厥用焉求父唱于前子和于後兵  
燹之餘聿新良構寧事殷游思學之懋學功伊何夙夜



無譽極夫顛連如涉大川脫彼墊溺升諸堂筵誰無齋  
居乃名為舫以燕以娛以速官謗儆戒或怠其心則放  
斯堂暨軒閑閑言言有瑟有琴有典有墳春誦夏絃啟  
迪後昆凡厥弟子泳涵聖髓一葦杭之毋或中止大書  
軒楹銘者太史

耘庵銘

良鄉丞陳謙益仲東甌人也嗜學弗倦慨然有志於事  
功陳翰林元達以飛白書其憩止之室曰耘庵夫耘之

為義耨治蕪穢之謂也種而能耘黍苗芄芄然興矣益仲其知自治者哉作耘庵銘銘曰

伊人之情譬彼良田嘉種誕布黍苗芊綿耘耔不加載蕪載穢既茁而軋長莫之遂我田我耘我苗日豐有實其同迄于獲功記禮之家人以為奧得奧斯理失則罔效和其柔剛脩禮以耕陳義而種善道乃亨耨在講學去非存是合其所盛本仁以聚感之使堅播樂以安五者既至學功始完惟益仲氏孜孜好禮以耘名室義或

取此古訓洋洋觸類而通母拘一曲滯而不融太史作  
銘勒於坐側上慎旃哉服之無忒

三奇石後銘有序

三奇石後銘為吳士朱孟辨作孟辨獲石聚寶山間製  
為山玄膚玉芝朶斷雲角三名其友王蒙先生圖而銘  
之銘邃甚至不容繼孟辨強余述之信乎珠玉在側覺  
我形穢也其詞曰

山玄膚割紫蕤星寶魄石抱腴蒼水使者珮失琚山鬼

環守目睢盱內藏一升白龍酥餐之凌霄躡雙鳬奮迅  
八極遊清都山玄膚玉為徒 玉芝朶自天墮暈翠霞  
裁綺儼燬以九陽真頑火有聲泓噌玉之瑳不學三秀  
脆而夥韓終欲撻意仍叵青鳥傳信以需我玉芝朶青  
媚媚 斷雲角鬼斧琢秀稜稜文斲斲霓旌難攀泝寥  
廓手析祥氛勵一握尚帶蛟龍氣旁魄神每變幻資索  
籊上衝牛斗香如濯斷雲角鎮書幄

詩塚銘 有序

番有奇男子曰魯脩學詩李存先生先生以文雄江東  
獨才脩脩有詩朋十人皆緣情善賦番數罹兵燹脩懼  
其詩失傳埏埴為甕刻瘞芝山中瘞已請太史宋濂勒  
銘其上銘曰

河清嶽明効坤之靈何縉綏兮鳥文龍章於粲其英  
昌厥辭兮冥智斂真返諸至神糴黃墟兮洩為醴泉三  
秀千眠合貞符兮番山可夷番川可移道如初兮

丹井銘

海虞有虞山梁天監初漢天師十二代孫張道裕來隱  
其下建招真之治鑿丹井焉宋淳熙中道士李正則浚  
井得藏丹石礧啟之化為雙紅鴿飛入上湖至今湖中  
丹光煜煜然邇年井且廢莫知其所周尊師玄真窮日  
力尋獲之重加以甃構亭覆其上時皇明洪武元年也  
然僊家煉丹必以井故名山多有之其在今海虞者舊  
廢而新治豈玄學復興之徵與銘曰

太陰委精自天一融而為液養萬物神丹浴之赤如日

有夫玄中發我室雙禽衝霞飛眈眈靈泉重噴甘逾密  
飲焉壽與天地畢

了園銘

嗣漢天師張真人宇初築室龍虎山中脩鍊瓊丹動靜  
兩忘已而神聚氣凝混含為一至和坎北返乎太初真  
人既獲覩內景之秘因題其室曰了園所以識也玄貞  
道士為原玄北之旨而勒銘曰

高上洞玄陽陰之根凝和攝真是謂崑崙中有三關七

絳宇閣上絕霞表下淪洞冥邈而索之黃房絳庭靈明  
潛通空澄淨泓真人之居規中為城龍帔鳳舄靈裾飛  
翻左挾元英右衛白元仰睨太蒙噓氣成雲化生萬神  
合妙為真昇真玉虛朗氣洞清哀厥下士麓穢莫澄神  
隨形化降于北陰迺勅雷電指麾六丁授以赤書制魄  
攝魂還乎混混閉絕九門南陽熙真爽朗秀英三靈發  
曜八素啟瓊出入泥丸翱翔紫清羽葆先導翹臺後登  
與天為徒振古長存



濂既作是銘或謂假象取喻而多瘦辭曷若著明言之嗚呼斯豈言之可明哉然而人身之內有至虛焉絲絡之所羣湊命蒂之所由生不倚八偶巍然中居此謂神之庭氣之母真息之根也人能存神於茲則性自復養氣於茲則命自正神與氣未始相離分之为二合之为一其殆化源也歟然欲了之則未易為功也鳥之伏鷖不足以言溫陶之烹瓦不足以言凝鑑之照形不足以言明勝是三者庶幾氣神混合自

然成真而猶未忘乎迹也蓋有非神之神而行乎九天非氣之氣而超乎九地方所不能拘小大不能計而了之名且立矣了之名苟未泯如隔紗縠而觀明月耳著明之言固無越於此然亦糟粕而已爾土苴而已爾何足以言了哉或者一笑而去因不欲棄而書諸銘後

五輪沙漏銘

沙漏之制貯細沙於池而注於斗凡運五輪焉其初輪

軸長二尺有三寸圍寸有五分衡莫之軸端有輪輪圍  
尺有二寸八分上環十六斗斗廣八分深如之軸杪傳  
六齒沙傾斗運其齒鈎二輪旋之二輪之軸長尺圍如  
初從莫之輪之圍尺有五寸輪齒三十六軸杪亦傳六  
齒鈎三輪旋之三輪之圍軸若此與二輪同其如初軸  
杪亦傳六齒鈎四輪旋之四輪如三輪唯莫與二輪同  
輪杪亦傳六齒鈎中輪旋之中輪如四輪餘輪側旋中  
輪獨平旋軸崇尺有六寸其杪不設齒挺然上出貫於

測景盤盤列十二時分刻盈百斷木為日形承以雲麗  
於軸中五輪犬牙相入次第運益遲中輪日行盤一周  
雲脚至處則知為何時何刻也餘輪各有楹附度中輪  
則否輪與沙池皆藏几腹盤露几面旁刻黃衣童子二  
一擊鼓一鳴鉦亦運衍沙使之沙之進退則日一視焉  
此其大略也初灤陽水善冰雖爨鼎沃湯不能為漏新  
安詹君希元乃抽其精思以沙代之漏成人以為古未  
嘗聞較之郭守敬七寶燈漏鐘鼓應時而自鳴者殆將

無媿乎浦陽鄭君永與希元游京師因知其詳歸而製  
之請余銘銘曰

挈壺建漏測以水用沙易之自詹始水澤腹堅沙弗止  
一日一周與天似鄭君繼之制益美請惜分陰視斯晷  
國史研銘

濂為國史遂以官名硯勒銘于陰誕敷帝制宣人文赤  
光如虹燭乾坤後千百載傳愈新

銅雀瓦研銘

有序

臨汾徐昭家藏銅雀瓦研獲於漳河中相傳逾百齡兵  
部員外郎許珪以使事過之遂購焉質貞而文黜蓋真  
物云太史金華宋濂為造銘曰

埏埴成胎資氣母炎火一爍貞且壽禁雨迴風著勲久  
何哉舞榭鹿爾踪天假漳河滌其醜出贊觚翰列左右  
虹光夜半上衝斗龍圖龜文首交紐要使遺文傳弗朽

海東石硯銘二

形圓如日出海東五色寒芒貫當中發為人文亮天功

毓至陽產樽桑王之英人之章

硯銘三

玄之胄靜重故壽以墨為守勿輕售弘經演道爾則茹  
之揆葩揚藻爾則吐之如鐵之堅尚欲磨而穿況斯石  
也乎夜窮晝研翕坤闢乾期遠濟於聖域乎

婺溪石研銘

歙之有研自唐開元中葉礪始礪獵師也因逐獸發之  
後為南唐元宗所賞愛名遂與端石齊其地在長城里

之龍尾山山一名羅紋其下乃芙蓉溪研溪產者號為  
尤長瀟嘗獲其一腹有刻文云李少微造少微元宗時  
硯官也制作絕工綴可寶已銘曰  
外雖黑內則白馬生角兮性乃易

濟源研銘

濟源硯者李文簡公故物也瀟銘之以遺龍舒學子李  
端銘曰

持爾堅以尚爾玄母為白也遷



日本硯銘

夷而華四海一家此非文明之化邪

髮櫛銘

髮有垢尚假爾治心有垢人胡不思

楷木杖銘

客有遺予孔林楷木杖者橫文如蛇腹節節可觀刻斯銘銘曰

託根兮孔林有文橫橫兮如玉如金千載寂寥兮孰白

爾扶持之心

栢杖銘

用之則行舍之則藏嘉言孔彰懷允不忘

楷木杖銘

生孔林承聖澤文庾庾光繹繹扶顛持危資爾德

藤杖銘

形之圓兮性之堅兮節之全兮吾與子周旋兮

惠香寺新鑄銅鐘銘

浦陽有大蘭寺在白麟溪之濱者曰香嚴創建於東晉  
時年代遼邈所鑄之鐘或成或壞不能盡知其可知者  
宋寶元間繼隆大師實為之隆嘗走汴京得中宮賜銅  
為助而兵部侍郎胡公則力相其事至慶厯甲申鐘始  
成越七十有八年睦寇至毀焉時宣和辛丑之春二月  
也普照大師子文即帥其衆而繼為之至甲辰冬十月  
鐘復成越二百三十年寺災鐘又毀焉則今至正癸巳  
之秋八月六日也沙門普照與同流六十有二人謀曰

成壞之相勢常相因而鐘者所以警昏眈昭法度祛障蔽也吾等不可以不亟圖遂走告里之善士于君城城廼捐錢一千五百緡俾合餘燼而新之銅以斤計舊者三千八百有奇新者二百有奇至冬十二月二日鐘復成昔天台智者大師深弘法華之旨未十餘傳其教幾絕吳越國師德韶為聞于錢忠懿王遣使航海求其書於高句驪後卒盛行當時之人以國師與智者同族姓疑其乘願輪而再世焉今照之名與子文之號正同或

後或先又皆以音聲為佛事較之國師其迹固殊所以  
昭前人之業使之貽永久而弗墜者則一而已夫豈偶  
然哉雖然大圓覺海本無異同孰能分別後先形相若  
區區致泥於名迹之間亦惑矣必也自聲而生悟自悟  
以入道庶幾無負於斯鐘之建也與瀟近遷居寺東五  
里青蘿山中與僧崇侃游甚洽侃一旦來謂瀟曰子盍  
銘吾鐘乎廼為之銘曰

如來法門千差萬別孰方便故以一音攝有靈者鐘即


廣長舌或震或鐘熾然而說其五時所宣諸脩多羅無  
量妙意中無不包一歷耳根千劫弗磨黃緣入道莫比  
為多<sup>其二</sup>白麟溪濱有大蘭若是惟香嚴法器所舍鬱攸  
構災一夕而化畢竟有形終屬幻假<sup>其三</sup>寺之比丘咸作  
是言彼成壞相如風轉輪往過來續後先相因不有廢  
者吾何以興<sup>其四</sup>迺謁檀那迺咨鳧氏迺簡赤金以歸鑪  
錘侈弇中程薄厚隨軌外圓中虛與法為體<sup>其五</sup>若龍象  
衆暨諸鬼神胡跪作禮靡間幽明臺簏高懸有聲鏗鉤

如獅王吼如蛟龍鳴其上徹諸天下入九地因聞生悟

弗迷邪趣聲攝入曾無留礙盡轉如來大圓鏡智其

我昔嘗聞此妙音聲不從鐘出不由耳生隨處充滿非

減非增願咸諦聽同證真乘其



文憲集卷十五